

<><><><><><>

Headlines

1. सरकार इक देश इक चुनां विधेयक मामले गी अज्ज संयुक्त संसदी कमेटी गी सौंपग।
2. केन्द्री गृहमंत्री अमित शाह होर अज्ज नमीं दिल्ली च इक उच्ची सतह् दी सुरक्षा जायजा बैठका दी अध्यक्षता करगन।
3. उपराज्यपाल मनोज सिन्हा होरें श्री माता वैष्णो देवी श्राईन बोर्ड दी 73मीं बैठक दी अध्यक्षता कीती। श्रद्धालुएं लेई केई सुविधाएं दी शुरूआत बी कीती।
4. उपराज्यपाल मनोज सिन्हा होरें राघवेन्द्र पचांग दे रजत जयंती संस्करण गी जारी करदे होई आखेआ जे एह साढ़े मुखें दी समुंद्र सगोसार संस्कृति ते विरासत गी दर्शादा ऐ।
5. मुखमंत्री उमर अब्दुल्ला होर कठुआ च अगग लगने आली घटना पर गैहरा दुख प्रगट कीता ऐ।

<><><><><><>

JPC-ONOE

सरकार इक देश इक चुनां विधेयक दा मामला अज्ज संयुक्त संसदीय समिति गी सौंपग। इस समिति च लोकसभा दे 21 ते राज्यसभा दे 10 मिनबर शामिल न। समिति च बीजेपी दे पी.पी. चौधरी, अनुराग सिंह ठाकुर, परषोत्तम भाई रूपाला, कांग्रेस नेता प्रियंका गांधी ते मनीष तिवारी, तृणमूल कांग्रेस दे कल्याण बेनर्जी ते राष्ट्रवादी कांग्रेस पार्टी शरद पवार गुट दी सुप्रिया सुले शामिल न।

<><><><><><>

HM Amit Shah

केन्द्रीय गृहमंत्री अमित शाह होर अज्ज नमीं दिल्ली च इक उच्च सतह् दी बैठक दी अध्यक्षता करगन। बैठक च जम्मू कश्मीर सनें सुरक्षा सरबन्धी केई महत्वपूर्ण मुद्दे उप्पर सोच बचार कीता जाग। जम्मू कश्मीर दे उपराज्यपाल मनोज सिन्हा होर बी इस बैठक च शामिल होंगन। बैठक दा उद्देश्य जम्मू कश्मीर च रमानदारी ते स्थिरता जकीनी बनाने दिएं नीतिएं दी समीक्षा करना ऐ। एहदे च राष्ट्रीय सुरक्षा सलाहकार अजीत डोगल, केन्द्रीय गृह सचिव गोविंद मोहन, खुफिया विभाग दे निदेशक तपन डेका, थलसेना प्रमुख उपेन्द्र द्विवेदी, केन्द्रीय थेआरबंद बलें दे महानिदेशक, जम्मू कश्मीर दे मुख सचिव ते पुलस महानिदेशक बी शामिल होंगन।

<><><><><><>

J&K Encounter

कश्मीर घाटी दे कुलगाम जिले दे दूर-दरेडे इलाके कददेर च सुरक्षाबलें ते आतंकवादिएं बश्कार टाक्करा होआ ऐ। पुलसै मूजब, इलाके च आतंकवादिएं दी मजूदगी बारै इक पक्की सूह् थोने मगरा जिसलै सुरक्षाबलें आसेआ उत्थे घेराबंदी ते तपाशी अभियान चलाया जा करदा हा, तां उत्थे छप्पे दे आतंकवादिएं, सुरक्षाबलें पर अन्नेबाह् गोलीबारी शुरू करी दित्ती जेह्दे मगरा टाक्करा भखी पेआ। इस बारै होर ब्यौरे गी बलगेया जा करदा ऐ।

<><><><><><>

LG-SMVDSD

उपराज्यपाल मनोज सिन्हा होरें कल राजभवन जम्मू च श्री माता वैष्णो देवी श्राईन बोर्ड दी 73मी बैठक दी अध्यक्षता कीती। बैठक दे बाहरे उपराज्यपाल होरें श्रद्धालुएं लेई केई सुविधाएं दी शुरूआत बी कीती जिंदे च कटड़ा-रेलवे स्टेशन पर यात्री सुविधा केन्द्र, ते बाणगंगा थाहर श्राईन बोर्ड दे मलाजमें दे ठैहरने दी बवस्था “शुभ्रा भवन” बी शामिल ऐ। उपराज्यपाल मनोज सिन्हा होरें माता दे भवन च रश गी घट्ट करने लेई बनाए जाने आले बाहर औने आले रस्तें दा ई-सरिस्ते राएं नींह पत्थर बी रखेआ। एह्दे इलावा उनें श्राईन बोर्ड दी वैबसाइट पर आर्टिफिशल इंटैलीजेंस पर आधारित चैट बॉट “शक्ति” दी शुरूआत कीती ते श्राईन बोर्ड दे पचांग कलेंडर-2025 ते इक डैरी गी बी जारी कीता। बोर्ड दी बैठक च केई महत्वपूर्ण विषें पर चर्चा होई, पैहले लैते गेदे फ़ैसले पर होई दी कारवाइएं पर सोच बचार कीता गेआ ते केई नमें फ़ैसले बी लैते गे।

<><><><><><>

Dy. CM

उपमुख्यमंत्री सुरिन्द्र कुमार चौधरी होरें कल आखेआ जे सरकारे आम जनता गी पेश ओने आलिएं दिक्कतें परेशानिएं ते तुरत नबेड़े गी जकीनी बनाने लेई असरदार सरिस्ता कायम कीता गेदा ऐ ते सरबंघत अफसरें गी निर्देश जारी कीते गेदे न जे लोकें मुद्दे गी जिन्ना तौले होई सकै, पैहल दी बिनाह् पर नबेड़ेया जा। उपमुख्यमंत्री होरें कल उनेंगी मिलने आए दे बक्ख-बक्ख शिष्टमंडलें कन्नै गल्लबात करा करदे हे। लोकें उंदे कन्नै अपनियां केई दिक्कतें शकैतें, विकास सरबंघी मुद्दें ते सार्वजनिक सेवाएं सरबंघी मसले सांझे कीते। कल गै किश विधायक, साबका सरपंच ते बक्ख-बक्ख इलाके थमां आए दे लोकें दे प्रतिनिधिमंडल बी उनेंगी मिले ते अपने अपने इलाके दे मुद्दें उंदे अग्गे रखे, जिनेंगी धरोइयै सुनने परेंत सुरिन्दर चौधरी होरें उंदे तौले नबेड़े दा भरोसा दोआया।

<><><><><><>

DC Reasi & Ramban

रियासी दी डिप्टी कमीशनर निधि मलिक होरें सु-शशासन सरबंघी सप्ताह ारबंघी गतिविधिएं दी तैआरी दा जायजा लैता। उनें प्रशासन गांव की ओर अभियान दी बी शुरूआत कीती। उनें अधिकारिएं गी हिदायत कीती जे ओह् दूर दरेडे ते पिच्छड़े दे इलाकें च लोकें तगर पुज्ज बनाने ते उंदी समस्याएं दा हल करने लेई शिविर लान। एह्दा मकसद आम नागरिकें दी शमूलियत गी बधाना ते सरकारी सेवाएं गी लोकें तगर पजाना ऐ। मुख् करी ध्यान सी.पी.ग्राम्सते जेके समाधान पर दित्ता गेआ। इस चाल्ली दी इक बैठक रामबन च लग्गी। एह्दी सदरत रामबन दे डिप्टी कमीशनर बसीर उल हक चौधरी होरें कीती। इस दरान प्रशासन

गांव की ओर अभियान दी तैआरिएं दा जायजा लैता गेआ। एह अभियान अज्ज थमां 24 दिसम्बर तगर रामबन दे डिप्टी कमीशनर हुंदी अगुवाई च होंग।

<><><><><><>

RambanAnimal Husbandry(byte)

रामबन च पशुपालन मैहकमा जिले च दुधै दी पैदावार बधाने, माल बच्छे दी बेहतर दिक्ख—रिक्ख ते पशुपालन गी बढ़ावा देने लेई बेहतर माहौल ते सुविधा जकीनी बनाने लेई केई कम्म करा’रदा ऐ। अपनिएं इनें कोशतें ते पैहलकदमिएं दे इक हिस्से दे तौर पर मैहकमे नै एटीएमए प्रोग्राम गी बी लागू कीता जेहड़ा जे राई—बाई ते एहदे नै जुड़े दे होरने कम्मं च नमिएं तकनीकें दे इस्तेमाल कन्नै बेह्तरी आहनने लेई शुरू कीता गेदा ऐ। एहदे पिच्छे दा मकसद जिले दे पशुपालन गी सरकार दिएं बक्ख—बक्ख स्कीमें कन्नै बी वाकफ कराना ऐ तां जे ओह इंदे थमां पूरा पूरा लाह हासल करी सकन। मुख्य पशुपालन अधिकारी डॉ. सुहेल काबूरा होरें आखेआ

<><><><><><>

LG-Panchang

उपराज्यपाल मनोज सिन्हा होर जम्मू यूपिवर्सिटी च श्री राघवेन्द्र पचांग दा रजत जयंति संस्करण कीता। अपने संबोधनै च उपराज्यपाल होरें पचांग सरबंधी टीम ते श्री राघवेन्द्र ज्योजिष संस्थान ट्रस्ट दे सारे मिंबरें गी बधाई दित्ती। उनें लोकें गी जागरूक करने च ट्रस्ट दे जतनें दी बी सराहना कीती। पचांग आली विरासत गी अगगे बधाने ते मुख्य दी समृद्ध, संस्कृति ते विरासत गी दर्शाने आले जतनें दी सिफत कीती। उनें विश्वास जाहर कीता जे ज्योतिष ते प्राचीन ग्रंथ सारे लोकें दे जीवन च अहम भूमका रखदे न। असेंगी सब्बने दे बेहतर ते अच्छे लेई चीजें गी बढ़ावा देना लोड़चदा। उपराज्यपाल होरें आखेआ जे असें सब्बने गी अपना ध्यान बेहतर ते मुल्ले कदरें आले जीवन आली भेठा देना लोड़चदा। उपराज्यपाल होरें गी राघवेन्द्र ज्योतिष संस्थान ट्रस्ट गी आखेआ जे ओह पचांग दी डिजीटल प्रकाशन बी करन।

<><><><><><>

CM-Fire Incident

मुख्यमंत्री उमर अब्दुल्ला होरें कठुआ जिले च अगग लगने आली घटना च 6 लोकें दी जाने जाने आले हादसे पर दुख ते बसोस जाहर कीता ऐ। अपने सौगी सनेह च मुख्यमंत्री होरें इसगी दुखद घटना करार दित्ता। मुख्यमंत्री होरें घायलें दे तौले नरोए होने दी कामना कीती। उनें सौगी परोआरें प्रति अपनियां संवेदना बी जाहर कीतियां।

<><><><><><>

Transporters Delegation

ट्रांसपेर्टरें दे इक प्रतिनिधि मंडल ते कल जम्मू कश्मीर दे ट्रांसपोर्ट आयुक्त विशेष पाल महाजन हुंदे कन्नै मलाटी कीती। इस दरान उनें ट्रासेपोर्ट आयुक्त होरें गी अपनी मंगें ते समस्याएं कन्नै अवगत करोआया। प्रतिनिधिमंडल नै नमें ट्रांसपोर्ट आयुक्त हुंदा सुआगत कीता ते मेद जाहर कीती जे उंदे लम्मे चिरे थमां बकाया पेदे मसलें दा हल आयुक्त हुंदी दखल कन्नै होई जाग।

आयुक्त होरें भरोसा दोआया जे सारे जायज मसलें गी बनकदे मंचे ते थाहरे पर रखेआ जाग। उनें गलाया जे ट्रांसपोर्टरें कन्नै नियमित तौर पर गल्लबात होंदी रौहग।

<><><><><><>

Commisioner JMC

जम्मू म्यूनिसिपल कारोपरेशन दे आयुक्त डॉ. देवांश यादव होरें जम्मू साउथ दा दौरा लाया ते जम्मू म्यूनिसिपल कारपोरेशन आस्सेआ चलाई जा'रदी विकास ते साफ सफाई आली गतिविधिएं दा जायजा लैता। अपने दौरे दरान आयुक्त होरें त्रिकुटा नगर ते खुराना मार्बल चौक दा जायजा लैता ते शिड़क, गलिएं, नाले ते कचरे दे प्रबंधन सरबंधी गतिविधिएं दा जायजा लैता। समुदायिक शमूलियत दी महत्ता गी उजागर करदे होई उनें उत्थें रौहने आले लोकें गी अपील कीती जे ओह अपने इलाके च साफ सफाई बनाई रख्वन।

<><><><><><>

DC Poonch

पुंछ दे डिप्टी कमीशनर विकास कुंडल होरें खानेटर कश टांडा ग्रां दा दौरा लाया ते मकामी ढांचागत जरूरतें दा जायजा लैता। मकामी लोकें कन्नै गल्ल करदे होई उनें टांडा पुल दे निर्माण सरबंधी लम्मे चिरे थमां बकाया पेदे मंग गी बी सुनेआ। डिप्टी कमीशनर होरें एहदे पर अपनी प्रतिक्रिया दिंदे होई पीडब्ल्यूडी दे एकजीक्यूअिव इंजीनियर गी हिदायत कीती जे पुल दी व्यापक प्रोजेक्ट रिपोर्ट बनाई जा। डिप्टी कमीशनर होरें मकामी लोकें गी भरोसा दोआया जे उंदी मंगें गी तौले गै पूरा कीता जाग।

<><><><><><>

Samba Voter

सांबा जिला प्रशासन नै डिप्टी कमीशनर राजेश शर्मा हुंदी सरपरस्ती च ब्लाक राजपुरा च मतदाताएं दे नां पंजीकृत करने लेई खास शिविर दा सरिस्ता कीता। एह जतन मतदाताएं गी जागरूक करने लेई स्वीप तैह्त आयोजित कीता गेआ। एहदा मकसद मतदाता शमूलियत गी बधाने ते मतदाता सूचिएं गी ताजा तरीन बनाना हा। पंचैत मतदाता सूचि तैआर करने लेई मतदाता सूचिएंदी नजरसानी कीती जा'रदी ऐ ते एहदे लेई खास शिविर आयोजित कीते जा'रदे न। इस कार्यक्रम च वरिष्ठ अधिकारिएं सनं एसडीएम घगवाल, तैहसीलदार राजपुरा ते बीडीओ राजपुरा नै बी हिस्सा लैता।

<><><><><><>